

NAQQIUT

Taarserpaa oqaaseqaatit nalinginnaasut kalaallisui 11. august 2016-imeersut
(Inatsisissatut siunnersuummi oqaasertaliunneqartut naqqinnerisa kingunerisaanik
naqqiinnerit)

Inatsisissatut siunnersuummut nassuiaatit**Oqaaseqaatit nalinginnaasut****1. Aallaqqaasiut**

Atuarfimmii pitsaassutsip qaffatsinnissaa siunnersuummi pingaarnertut siunertaavoq. Atuarfimmii ataatsimut akisussaaffeqarneq siunnersuummi aallaaviuvoq, taamaammallu ataatsimoorluni suliaqarnissaq aamma pisariaqarluni, tassani pingaarnertut ingerlatsisut tassaallutik oqartussaasut, atuarfiit pisortaat, ilinniartitsisut angajoqqaallu.

Taamaammat siunnersuutigineqarpoq meeqqat atuarnerannik atugarissaarnissaannillu soqutigisaqaannangitsunik aammali atuarfiup ataatsimut isigalugu ineriartornissaanik soqutigisaqartunik angajoqqaat aallartitaqarfigisaannik inatsisitigut tunngaveqartumik suliaqarfimmik pilersitsisoqassasoq.

Aammattaaq oqaatigineqarsinnaavoq ukiut arlaqanngitsut qaangiuttut ullormut oqaluuserisassamut UKA 2011/77-imut atatillugu assingusumik siunertaqarluni angajoqqaat peqatigiiffiannik pilersitsinissaq pillugu apeqqut Inatsisartut oqallisiginikuugaat. Siunnersuut aamma KANUKOKA-mut aamma Kommuneqarfik Sermersuumut oqaloqatigiissutigineqarnikuuvoq.

Siunnersuut meeqqanut atuarfimmiiittunut angajoqqaajusut maannamut namminneq kattussimanginnerat taamaalillutillu ullumikkut ataatsimut oqaaseqartitsisannginnerat tunngavigalugu isigineqassaaq. Siunnersuummi taamaammat siunertaavoq atuarfeqarnermi apeqqutit pingaaruteqartut pillugit angajoqqaat isumaannik ataatsimut nalunaaruteqarfissaannik pilersitsinissaq. Tamanna assersuutigalugu malittarisassanut il.il. siunnersuutit tusarniutigineqarnerannut atatillugu pisinnaavoq. Aammattaaq nalunaaruteqartarfik taanna nuna tamakkerlugu siunnersuisooqataalluni angajoqqaat isumaannik pisariaqartumik saqqummiisarfiusinnaavoq isiginninniartitsilersinnaallunilu, ilaatigut ingerlatsisutut allatuulli sunniuteqarsinnaatigaluni atuarfiup ineriartornera pillugu oqallinnermi peqataasinnaanermut tunngatillugu.

Assersuutigalugu atuarfeqarneq pillugu siunissami oqallittarnissanut, ineriartortitsinermi suliniuteqartarnissanut inatsisiliorniarnernulluunniit atatillugu atuarfik pillugu angajoqqaat soqutigisaannik ingerlatsiveqarnissaata aqqissuussaansatut siunnersuutigineqartumi qulakkeerneqarnissaa siunnersuummi siunertaavoq pingaaruteqartoq. Tamassuma saniatigut

siunertaavoq angajoqqaanik nuna tamakkerlugu kattutsitsineq meerartatta siunissami atuarnissaat atugarissaarnissaallu pillugu oqallittarnerit pitsaassusilernissaannut allanngorartuunissaannullu tapersiissasoq. Ilaatigut ilimagineqarpoq atuarfiup pitsaassusaanut tunngatillugu eqeersimaarluni kinguneqartussamillu oqallinnernut siunnersuisoqatigiit peqataasernerisigut tamanna pissasoq, tassunga ilanngullugu atuarfimmi suliaqarnerup aaqjissuunnerani naleqqutingitsunik suliniutaasinnaasut uparuartarnissaannut aaqjiissutissanillu siunnersuuteqartarnissamut tunngatillugu.

Aammattaaq eqqarsaataavoq atuarfimmi meeqqanut perorsaanermilu suliaqarnermut tunngatillugu angajoqqaat peqataanerullutik ataavannerusumillu iliuuseqartarnissaannut siunnersuisoqatigiissitassatut siunnersuutigineqartoq aamma qulakkeerinnissinnaassasoq.

2. Siunnersuummi immikkoortut pingaernerit

a) Inatsit atuuttoq

Inatsit atuuttoq tassaavoq Atuarfik pillugu Inatsisartut inatsisaat nr. 15, 3. december 2012-imeersoq. Inatsimmi § 45-p saniatigut, tassani ersilluni ilaatigut inunnik meeqqanut atuarfimmi allatsissimasunut angajoqqaatut oqartussaassuseqartunik imaluunniit paaqqinninnissamut akuersissuteqartunik angajoqqaat qinigaannik tallimanik sinniisoqartunik atuarfinni ataasiakkaani atuarfimmi siulersuisunik pilersitsisoqassasoq, angajoqqaat sinniisaat pillugit atuarfiit aaqjissuussaanerani ingerlatsiveqanngilaq. Aammattaaq sumiiffinni atuarfinni siulersuisut atuuttut atuarffinnut aalajangersimasunut atuupput. Taamatuttaaq inatsimmi § 47 naapertorlugu atuarfinni siulersuisut atuarfimmi atuuffianni suliassaat pineqarnerupput.

Tamassuma saniatigut angajoqqaat saniatigut allanik suliaqartut atuarfiit siulersuisuini sinniisoqarput. Taamaalilluni ilinniartitsisut sinniisoqarput. Aamma atuarfik taamaallaat 7. klassi tikillugu klassilik pineqanngippat kommunalbestyrelsillu pisuni aalajangersimasumi atuarfimmi siulersuisut inassuteqaateqarnerisa kingorna atuartut sinniisaat akuerisimangippatigut atuartut aamma sinniisoqarput.

Soorlu oqaatigineqartumi ersittoq atuarfinni siulersuisut siunnersuisoqatigiinnit siunnersuummi pineqartumit allaanerupput.

Inatsimmi atuuttumi ersippoq atuarfik kommunit suliassarigaat, kommunalbestyrelsillu kommunimi atuarfeqarfimmut pingaarnertut akisussaasuusut. Aammattaaq kommunimi meeqqat atuartitaasussaataasut atuarfinni allatsissimanissaat imaluunniit atuarfimmi nalinginnaasumik piumasaqaatigineqartut malillugit atuarinneqarnissaat kommunalbestyrelsit nakkutigissallugu pisussaaffigaat.

Kommunalbestyrelsit aamma atuarfiit ingerlatsineranni anguniakkanik sinaakkutinillu aalajangersaassapput, atuarfiillu ingerlatsinerat nakkutigissallugu. Aamma atuarfinni

ataasiakkaani atuarfimmi siulersuisut atuarfiup atuartitsineranut allanillu ingerlatsineranut atuarfimmi aqutsisut perorsaанermullu siunnersuisoqatigiit suleqatigalugit anguniakkanik najoqqutassanillu aalajangersaassapput.

Tamassuma saniatigut ersippoq kommunalbestyrelsit atuarfimmik aqutsinerat Naalackersuisut nakkutigissagaat, Naalackersuisullu nakkutilliinermut atatillugu kommunalbestyrelsit pisariaqartutut isigineqartunik ilisimatitsissuteqaqqusinnaagaat.

Aamma malittarisassani atuuttuni ersippoq suliamik ingerlatsinermi siunnersuisoqarnikkut, atuartitsissutunik ineriartortitsinikkut, atuarfinni ilinniartitsisunik aqutsisunillu pikkorissartitsinikkut, perorsaанikkut ilisimatusarnikkut ineriartortitsinikkullu kiisalu atuarfinnik ingerlatsineranik naliliisarnermut tunngatillugu Naalackersuisut arlalinnik suliaqartassasut. Aammattaaq kommunalbestyrelsit suliassanik ingerlatsinerisa pitsanngorsarnissaa kiisalu immikkoortuni arlalinni sunniutinik uuttuinissaq siunertaralugit ilisimasanik katersuisarneq ingerlatitseqqiisarnerlu pillugit Naalackersuisut suliaqartassapput.

Inatsisip kinguneraa atuarfinni ataasiakkaani aqutsisut perorsaанermi piginnaatitaaffeqartut nammineersinnaatitaallutillu, kisiannili meeqqanut inuusuttunullu tunngatillugu aamma akisussaaffeqarput, kommunalbestyrelsillu tassunga peqatigitillugu atuarfinnik pitsaassutsip qanoq pitsanngortinneqarsinnaanera pillugu siumut isigineq aallaavigalugu atuarfimmi aqutsisut akisussaattissinnaassallugit.

b) Siunnersuut

Oqaatigineqareersutut siunnersuummi siunertaavoq angajoqqaat nuna tamakkerlugu siunnersuisoqatigiinnik sumulluunniit attuumassuteqaanngitsunik pilersitsinissamut inatsisitigut sinaakkutinik pilersitsinissaq, siunnersuisoqatigiinnilu pingaarnertut siunertaavoq angajoqqaat soqutigisaat aallutissallugit kiisalu angajoqqaat isumaannik siaruarterisarnermi akunniliulluni sullissisussaalluni.

Immikkoortoq a qulaaniittoq naapertorlugu suliassat akisussaaffiillu agguarnerisa allanngortinnissaat siunnersuummi siunertaanngilaq.

Siunnersuisoqatigiit suliassai aalajangersimasut tassaapput:

1. atuarfimmi pitsaassutsip qaffassarnissaa siunertaralugu inassuteqaateqartarneq, tassunga ilanngullugu pitsaassutsit pillugit nalunaarusianut tunngatillugu,
2. nuna tamakkerlugu tusarniaanerni akisuteqartarneq,
3. atuarfinni siulersuisut ataasiakkaat sulineranni siunnersuisarneq tapersiisarnerlu,
4. atuarfimmi pitsaassuseq pillugu ineriartortitsinermi suliniutini peqataasarneq, aamma
5. angajoqqaat atuarfimmi peqataatsinneqartarnerannut pitsaasumik sulisaaseq pillugu ilisimasanik paarlaasseqatigiittarneq.

Siunnersuisoqatigiit Inatsisartut inatsisaata sinaakkusiussaata iluanni allanik aamma suliaqarnissamut periarfissaqarpoq.

Siunnersuisoqatigiinni ilaasortanngornissamut piunasaqaat pingaarneq tassaavoq, angajoqqaq atuarfimmi allatsissimasumik meeraqassasoq. Siunnersuisoqatigiit tassunga peqatigitillugu suliaqarfiuvoq pisortanit inatsisiliunneqarsimagaluarluni aningaasalersorneqaraluarlunilu Namminersorlutik Oqartussanut kommunalbestyrelsinullu atassuteqanngitsoq. Tassunga atatillugu ilaasortat angajoqqaat soqutigisaannik aallussisinnaassuseqarnerinik apeqqusiisnaasunik suliffeqassanngillat. Tamassumunnga pissutaavoq atuarfimmi meeqqanut angajoqqaat soqutigisaannik ersersitsisumik siunnersuisoqatigiit suliaqarnissaata qulakkeernissaa siunertaralugu soqutigisat aporaassinnaanannut tunngatillugu siunnersuisoqatigiit illersorneqarnissaa. Tamanna naapertorlugu siunnersuutigineqarpoq angajoqqaat siunnersuisoqatigiivini ilaasortat inatsisartuni imaluunniit kommunalbestyrelsini ilaasortaassanngitsut, aammalu atuarfinnik aqutsivimmi soqutigisaqatigiilluunniit kattuffianni atuarfik pillugu suliaqartumi suliffeqassanngitsut.

Aammattaaq siunnersuisoqatigiit suliaasa suussusiata kingunerisaanik aalajangersarneqarpoq ilaasortat ataqqinissutsimik piunasaqaatitut taaneqartartumik eqquutsitsissasut. Tamassuma saniatigut siunnersuummi aalajangersarneqarpoq ilaasortat toqqaannartumik qinersinermi komminini ataasiakkaani ilaasortat marluk qinerneqartassasut, tassungalu peqatigitillugu siunnersuutigineqarpoq atuarfiit angissusaat tunngavigalugu atuarfinni anginerusuni mikinerusunilu soqutigisat naliliinerillu sinniisuuffigineqarnissaat qulakkeerneqassasoq. Atuartut amerlassusaannik 100-nik killeqartitsilluni atuarfiit angissusaannik killiliineq KANUKOKA-mik aamma Kommuneqarfik Sermersuumik tamanna pillugu oqaloqateqarnerit tunngavigalugit pivoq.

Aammattaaq siunnersuisoqatigiit ilisarnaatigaat, siunnersuisoqatigiinnut ilaasortanik qinersinerup aqqissuunneqarnera ingerlanneqarneralu kommunalbestyrelsinut, nunaqarfinni aqutsisut ilagiillu sinniisaannut qinersisarneq pillugu Inatsisartut inatsisaata ilaatigut assigigaa.

Tassunga peqatigitillugu siunnersuutigineqarpoq siunnersuisoqatigiit siulittaasuat piffissami tamaakkiisumi sulisutut akissarsiaqassasoq ilaasortallu allat nalingannaasumik akissarsiaqartinneqassasut, kiisalu siunnersuisoqatigiit ingerlatsineranut tapersiisoqartassasoq, tassunga ilanngullugu siunnersuisoqatigiit allatseqarneranut tunngatillugu. Aammattaaq nalunaarusiornikkut tamassumunnga malittarisassiortoqassappat, tapiissutit ilamerngi siunnersuisoqatigiinnut qinersisarneq pillugu paasissutissiissutinik suliaqarnermut atorneqassasut.

Aammattaaq immikkoortumi qulaaniittumi siullermi Aallaqqaasiummi oqaaseqaatit ataanilu siunnersuummi aalajangersakkanut ataasiakkaanut nassuiaatit innersuussutigineqarput.

Inatsisartut siunnersuut inatsimmut atuuttumut sanilliullugu

§ 1

Atuarfik pillugu Inatsisartut inatsisaat nr. 15,
3. december 2012-imeersoq imatut
allanngortinneqarpoq:

1. § 42-p kingorna kapitalitut nutaatut
ilanngunneqarpoq:

“Kapitali 8a

*Atuarfik pillugu angajoqqaat nuna
tamakkerlugu siunnersuisoqatigiivi*

§ 42a. Atuarfik pillugu angajoqqaat nuna
tamakkerlugu siunnersuisoqatigiivini
pilersitsisoqassaaq. Siunnersuisoqatigiit
kommunitit tamanit inunnik marlunnik
tamarmik immikkut meeqqamut atuarfimmi
allatsissimasumut angajoqqaatut
oqartussaassuseqartunik
paarisaqarnissamilluunniit
akuersissuteqartunik ilaasortaqassaaq.

Imm. 2. Siunnersuisoqatigiit suliassaraat:

- 1) atuarfimmi pitsaassutsip qaffassarnissaa
siunertarlugu inassuteqaateqartarnek,
tassunga ilanngullugu pitsaassutsit pillugit
nalunaarusianut tunngatillugu,
- 2) tusarniaanerni akissuteqartarnek,
- 3) atuarfinni siulersuisut sulineranni
siunnersuisarnek tapersiisarnerlu,
- 4) atuarfimmi pitsaassuseq pillugu
ineriartortitsinermi suliniutini peqataasarneq,
aamma
- 5) angajoqqaat atuarfimmi
peqataatinneqartarnerannut pitsaasumik
suleriaaseq pillugu ilisimasanik
paarlaasseqatigiittarnek.

	<p><i>Imm. 3.</i> Siunnersuisoqatigiit Inatsisartut inatsisaani uani killiliussat iluanni allanik suliaqarsinnaavoq.</p> <p><i>Imm. 4.</i> Siunnersuisoqatigiit ukiumut minnerpaamik sisamariarluni ataatsimiittassaaq. Ataatsimiinnerit tamanut ammasuunngillat. Oqaluuserisassat ataatsimiinnernilu imaqarniliat avammut saqqummiunneqartassapput. Inuit pillugit paasissutissat mianernartut annertuumik isiginiarneqarnissaat tamassumunnga tunngavissaqartitsippata ullormut oqaluuserisassat imaqarnilialluunniit isertuunneqassanersut siunnersuisoqatigiit aalajangersinnaavoq.</p> <p><i>Imm. 5.</i> Suleriaaseq siunnersuisoqatigiit nammineq aalajangersassavaat, taannalu ataatsimiittarnerit, taasisarnermut malittarisassat, suliamut attuumassuteqarpallaarneq imaqarniliallu pillugit malittarisassanik imaqassaaq.</p> <p>§ 42b. Siunnersuisoqatigiinni ilaasortat kommunini ataasiakkaani ilaasortassanik marlunnik inuit meeqqanut atuarfimmi allatsissimasunut angajoqqaatut oqartussaassusillit imaluunniit paarsinissamut akuersissuteqartut toqqaannartumik qinersinerisigut qinerneqartassapput, taamaalilluni kommunini ataasiakkaani atuarfinit ikinnerpaamik 100-nik atuartoqartunit ilaasortamik ataatsimik aamma atuarfinit 100 inorlugit atuartoqartunit ilaasortamik ataatsimik qinersisoqartassalluni.</p> <p><i>Imm. 2</i> Piffissaq qinigaaffik kingusinnerpaamik qaammammik ataatsimik sioqqullugu siunnersuisoqatigiinnut qinersisoqartassaaq.</p> <p><i>Imm. 3.</i> Qinersinerit kommunini tamani kommunalbestyrelsimit qinersinernik piareersaasussamik ingerlatsisussamillu</p>
--	---

	<p>qinersinermut siulersuisunik pilersitsisinnaasumik piareersarneqartassapput, aqunneqartassapput ingerlanneqartassallutillu.</p> <p>§ 42c. Siunnersuisoqatigiinnut § 42a, imm. 1 naapertorlugu angajoqqaq kinaluunniit nammineersinnaassusilik qinersinerlu sioqqullugu sivikinnerpaamik qaammatini arfinilinni Kalaallit Nunaanni aalajangersimasumik najugaqarnikoq ukiullu tallimat kingulliit ingerlaneranni pinerluttulerinermi pineqaatissiinermi inaarutaasumik eqqartuussaasimanngitsoq akiliisussanngortinneqarsimanngitsorluunniit ukiulluunniit kingulliit pingasut ingerlaneranni ulloq qinersiviusoq naatsorsuinermi aallaavigalugu siunnersuisoqatigiinni ilaasortaanissamut nalinginnaasumik tusaamaneqarnermi naleqqukkunnaarsitsisumik pinerluttulerinermi pineqaatissinneqarsimanngitsoq qinigaasinnaavoq. Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat naapertorlugu qinigaasinnaanermut ataatsimiititaliap Naalakkersuisunit pilersinneqarsimasup aalajangiiffigissavaa qinigaasoq pinerluuteqarsimaneq peqqutigalugu pineqaatissinneqarsimasoq qinigaasinnaatitaassannginnersoq.</p> <p><i>Imm. 2.</i> Siunnersuisoqatigiinnut ilaasortat Inatsisartunut, Folketingimut kommunalbestyrelsinulluunniit ilaasortaassanngillat qineqqusaartuussanatilluunniit aammalu atuarfinnik ingerlatsivimmi imaluunniit soqutigisaqatigiiffinni meeqqat atuarfiannik suliaqartuni sulisuussanani.</p> <p><i>Imm. 3.</i> Ilaasortat piffissamut ukiunut</p>
--	--

	<p>sisamanut qinigaasassapput, siullerpaamik piffissamut 1. juli 2017-imiit 30. juni 2021-mut. Ilaasortat tamarmik piffissap qinigaaffiup naanerani tunuassapput.</p> <p><i>Imm. 4.</i> Siunnersuisoqatigiinnut siulittaasoq siunnersuisoqatigiinni ilaasortat akornanni ilaasortanit qinerneqartassaaq. Siulittaasumik qinersinermit taasinerit amerlaqatigiippata qinigassanngortittut akornanni makitsinikkut siulittaasutut qinigaasoqartassaaq.</p> <p><i>Imm. 5.</i> Ilaasortat amerlanerussuteqartut ikinnerpaamik 2/3-iisa siulittaasoq assersuutigalugu annertuumik suleqataanngippat allatulluunniit siulittaasuunissamik naleqqukkunnaarpat piffissap qinigaaffiup ingerlanerani tunuartissinnaavaat. Ilaasortat piaarnerpaamik siulittaasumik nutaamik qinersissapput.</p> <p><i>Imm. 6.</i> Ilaasortaq piffissap qinigaaffiup ingerlanerani imm. 1-imi taaneqartunik pinerlunnernut pineqaatissinneqarpat imaluunniit imm. 2-mi taaneqartunik suliaqalerpat ilaasortaq siunnersuisoqatigiinniit ingerlaannarluni tunuassaaq, tamassumalu kingorna atuarfiit immikkoortuisa assingani, tak. § 42b, imm. 1 qinigassanngortissimasoq qinigaanikuunngitsorli amerlanerpaanillu qinersisulik siunnersuisoqatigiinni ilaasortaalissaaq. Tamanna aamma atuuppoq ilaasortaq kommunimit qinigaaffimmit nuuppat. Imm. 1, 2-mi qinigaasinnaanermut ataatsimiititaliap imm. 1, oqaaseqatigiit aappaanni taaneqartup aalajangissavaa pinerlussimanermut pineqaatissiissutaasimasoq ima pissuseqarnersoq ilaasortaq imm. 1 malillugu siunnersuisoqatigiinnit tunuartitaassalluni.</p> <p><i>Imm. 7.</i> Siunnersuisoqatigiinni ilaasortap meeraa atuarfimmi allatsissimajunnaarpat ilaasortaaajunnaarnissamik piumasaqarsinnaavoq. Qinigaajunnaarnermut</p>
--	--

	<p>ilaasortaajunnaarnermullu kommunalbestyrelsinut, nunaqarfinni aqutsisunut ilagiillu sinnissaannut qinersisarnerit pillugit Inatsisartut inatsisaanni aalajangersakkat aamma atuupput.</p> <p>§ 42d. Inuit siunnersuisoqatigiinnut qinigassanngortinnissaminnik kissaateqartut piffissaq qinersiviususaaq kingusinnerpaamik sapaatit akunnerinik sisamanik sioqqullugu qinigassanngortinnertik kommunalbestyrelsimut nalunaarutigissavaat.</p> <p><i>Imm. 2.</i> Nalunaaruteqarneq qinigassanngortittup aqqanik, atorfianik meeqqallu aturfiani sorlermi qinigassanngortittup meeraa allatsissimaneranik paasissutissanik imaqassaaq.</p> <p><i>Imm. 3.</i> Piffissaq nalunaaruteqarfissaaq naaniariartoq nalunaarutit tiguneqartut atorsinnaasutut akuerineqassanersut kommunalbestyrelsi aalajangiissaaq tamassumalu kingorna qinigassanngortittut ingerlaannaq nalunaarfigissallugit.</p> <p><i>Imm. 4.</i> Qinigassanngortittut aqqi kommunalbestyrelsip piaarnerpaamik avammut nalunaarutigissavai.</p> <p><i>Imm. 5.</i> Siunnersuisoqatigiinnut ilaasortanik qinersisarneq pillugu Naalakkersuisut annertunerusunik malittarisassiorsinnaapput.</p> <p>§ 42e. Qinersinerinerit pisassapput qinersivissaaq naqiteriigaq, siumut taaguummik ”Aturfik pillugu angajoqqaat nuna tamakkerlugu siunnersuisoqatigiivinnut qinersineq”-mik qulequtserneqarsimasooq, kalaallisut danskisullu allanneqarsimasooq atorlugu.</p> <p><i>Imm. 2.</i> Qinersinerit inimi kommunalbestyrelsip innersuussaani pisassapput.</p>
--	--

	<p><i>Imm. 3.</i> Imm. 2 naapertorlugu sumiiffinnut qinersiviusussanut tamanut qinersivissat naammattut pissarsiarinissaat agguataarnissaallu kommunalbestyrelsip akisussaaffigivaa.</p> <p><i>Imm. 4.</i> Kommunalbestyrelsi siunnersuisoqatigiinnut qinersinermut immikkut atugassamik qinersinermi allaffissannut nakkartitsivissanik pissarsissaaq.</p> <p>§ 42f. Qinersinernik kisitsinermi angajoqqaq kommunini ataasiakkaani atuarfiit immikkoortuini ataasiakkaani, tak. § 42b, imm. 1, amerlanerpaanik qinerneqartoq qinigaassaaq.</p> <p><i>Imm. 2.</i> Amerlaqatigiinnik qinersisoqartoqassappat makitsinikkut kina qinigaanersoq aalajangerneqassaaq. Makitsineq kommunalbestyrelsimit ingerlanneqassaaq.</p> <p><i>Imm. 3.</i> Kommunalbestyrelsit ataasiakkaat sinniisussat allattorsimaffiannik suliaqassapput, tassani angajoqqaat qinigaanngitsut atuarfiit immikkoortuinut tunngatillugu qinerneqarnerisa amerlassusaat malillugu tulleriinnilersorlugit allanneqassallutik, tak. § 42b, imm. 1.</p> <p>§ 42g. Siunnersuisoqatigiit sulinerat, tassunga ilanngullugit allatseqarnissamik inniminniineq kiisalu aningaasartuutit imm. 3-mi 4-milu taaneqartut, nunatta karsianit tapiissuteqarnikkut aningaasalersorneqassaaq.</p> <p><i>Imm. 2.</i> Nunatta karsianit ukiumoortumik tapiissutit ukiumi aningaasanut inatsiseqarfiusumi tullermi aningaasanut inatsisip akuerineqarneranut atatillugu Inatsisartunit aalajangerneqartassaaq.</p> <p><i>Imm. 3.</i> Naalakkersuit siunnersuisoqatigiinni ilaasortat akissarsiaat aamma ilaasortat aningaasartuutaannik,</p>
--	---

	<p>tassunga ilanngullugit ilaatigut angalanernut, nerisaqarnermut najugaqarnermullu aningaasartuutitik, taartisiaqartarneq pillugit malittarisassiussapput.</p> <p><i>Imm. 4.</i> Siunnersuisoqatigiit siulittaasuat sulinerminut Namminersorlutik Oqartussat qitiusumik allaffeqarfianni allaffimmi pisortat akissarsiaasa assinganik akissarsiaqartinneqassaaq.</p> <p><i>Imm. 5.</i> Tapiissutit ilaasa imm. 2-mi taaneqartut siunnersuisoqatigiinnik qinersisarneq pillugu paasissutissianut killilimmik atorineqartarnissaat pillugu Naalakkersuisut malittarisassiorsinnaapput.</p> <p>§ 42h. Siunnersuisoqatigiit, nunatta karsiata tapiissutaasa annertussusissaannik, tassunga ilanngullugit ukiumi aningaasanut inatsiseqarfiusumi tullermi missingersuutitut, Naalakkersuisut piffissarititatu aalajangigaasa iluanni siunnersuusiortassapput.</p> <p>§ 42i. Siunnersuisoqatigiit ukioq naatsorsuusiortat tassaavoq ukioq aningaasanut inatsiseqarfiusoq. Missingersuutit, naatsorsuuserineq naatsorsuutinillu saqqummiisarneq pillugit Namminersorlutik Oqartussat aalangersagaat qaqugukkulluunniit atuuttut siunnersuisoqatigiit malissavaat.</p> <p><i>Imm. 2.</i> Ukiumoortumik naatsorsuutit Namminersorlutik Oqartussat kukkunerisuiisuannit kukkunerisiorneqartassapput.</p> <p><i>Imm. 3.</i> Ukiumoortumik naatsorsuutit siunnersuisoqatigiit akuerisaat Naalakkersuisut piffissarititatu aalajangigaasa iluanni siunnersuisoqatigiit Naalakkersuisunut akuerineqartussanngorlugit saqqummiuttassavaat.</p>
--	--

	<p><i>Imm. 4. Naatsorsuutit Naalackersuisunit akuerineqareeraangata siunnersuisoqatigiit avammut saqqummiuttassavaat.</i></p> <p>§ 42j. Ukiup aningaasanut inatsiseqarfiusup naanerani siunnersuisoqatigiit ukiumi qaangiuttumi sulinertik pillugu nalunaarusiortassapput. Nalunaarusiaq Naalackersuisunut nassiunneqartassaaq taakkualu saqqummersittassavaat.</p> <p><i>Imm. 2. Nalunaarusiat ilaatigut siunnersuisoqatigiit ukiumi qaangiuttumi suliarisimasaannik sulisimanerannillu imaqartassapput. Ilaasortat tamarmik piffissap qinigaaffiup naanerani tunuassapput”.</i></p>
	<p style="text-align: center;">§ 2</p> <p>Inatsisartut inatsisaat ulloq 1. januar 2017 atuutilersinneqarpoq.</p>

3. Pisortanut aningaasatigut allaffissornikkullu kingunissai

Siunnersuisoqatigiinni ingerlatsinermi aningaasartuutit ilaasortat aningaasarsiaannut missingerneqarput katillugit 1 mio. kr. missaaniissasut. Taakku tassapput siunnersuisoqatigiit siulittaasuata piffissaq tamaat sulinermi aningaasarsiaa siunnersuisoqatigiinnilu ilaasortat allat aningaasarsiaat. Siunnersuisoqatigiinni ilaasortanut arfineq marlunnet siulittaasuunngitsunut aningaasarsiaasinnaasut kr. 50.000 aamma siulittaasup aningaasarsiasai kr. 600.000 naatsorsuutigineri aallaavigalugit naatsorsuisoqarpoq.

Ukiumi qinersiviusumi tamakku saniatigut 750.000 kr.-nik aningaasartuuteqartoqarnissaa missingerneqarpoq. Aningaasat tassaapput qinersinermut namminermt aningaasartuutit. Tamanna annerpaamik 250.000 kr.-ussasq missingerneqarpoq, tassa kommunalbestyrelsimut qinersineq peqatigalugu qinersisoqartartussaammat.

Qinersinernut atatillugu kommunini aningaasartuuteqartoqartassaaq. Taakku tassaanerussapput sulisut qinersinermik aaqqissuussisut ingerlatsisullu piffissaq suliffiat, tamassumalu saniatigut atortunut, aaqqissuinermt il.il. toqqaannartumik aningaasartuutit. Missingerneqarpoq qinersitsinermi qinersivimmi ataatsimi ullormut suliffiit agguaqatigiissillugu 15-it missaaniissasut, missingerneqarporlu qinersiviit 72-iussasut.

Ullormut suliffinnik missingiinermt ilaapput sulisut ullormi qinersivimmi namminermt qinersivimmiittussat, karsinik qinersinermi immersukkanik ikisivissanik inissiineq paaanerlu,

pappilissanik qinersinermi immersugassanik piareersaaneq il.il. Tamassuma assigaa ullormut suliffiusuni atukkani tamarmiusuni ulluni suliffiit 1080-it, tamassumalu assigaa piffissaq tamaat suliffiit 5,4 missaaniittut.

Piffissaq tamaat suliffiit 5,4 taakku missingerneqarput atorfirmut ataatsimut ukiumut aningaasarsianut katillugit 375.000 kr. aningaasartuutaassasut. Tassa kommunini qinersinernut aningaasartuutit tamarmiusut missingerneqarput 2.025.000 kr.-ussasut. Kommunit aningaasartuutitut taakkununga ukiut sisamakkaarlugit ataatsimut tapiissutikkut taarsiivigineqartassapput.

Tamassuma saniatigut qinigassanngortittut pillugit paasissutissanut takorluugaasalu qinersisartunut ingerlateqqittarnissaannut aningaasartuutit 500.000 kr. missingiussat ilaapput. Aningaasat paasissutissiisarfimmik qineqqusaartunit tamanit naligiimmik atugassaqartinneqarlutik atorneqarsinnaasumik pilersitsinissamut atorneqassapput. Tamanna pisariaqartutut isigineqarpoq, tassa siunnersuisoqatigiit qinigassanngortittut siunnersuisoqatigiinnut qinersinermut atatillugu takorluukkaminik kissaatiminnillu qinersisartunut paasissutissiinissamut, tassunga ilanngullugit akissaqarnissamut, partiini aaqjissuussaanerit assigisaannillu ikiorneqarsinnaannginnamik.

Qulaaniittut saniatigut angalasarnernik, ataatsimiittarnernik misissuisarnernik allatseqarnermilu ikiorserneqartarnissamik qulakkeerinnittumik siunnersuisoqatigiinnut ukiumoortumik aningaasaliisoqartassaaq. Aningaasartuut annertussusaat aningaasanut inatsimmi ukiumoortumik aalajangerneqartassapput, missingerneqarporli siunnersuisoqatigiit ingerlatsinissamut periarfissaqavinnissaa qulakkeerniarlugu taakku minnerpaamik 1 mio. kr.-iussasut.

Ukiumi qinersiviusumi siunnersuisoqatigiinnut aningaasartuutit tamarmiusut katillugit 4.025.000 kr.-nut naatsorsorneqarput.

Ukiup qinersiviusup avataani siunnersuisoqatigiinnut aningaasartuutit tamarmiusut katillugit 2.000.000 kr.-nut naatsorsorneqarput.

4. Inuussutissarsiortunut aningaasatigut allaffissornikkullu kingunissai

Siunnersuut inuussutissarsiortunut aningaasatigut allaffissornikkullu toqqaannartumik kinguneqassanngilaq. Ilimagineqarporli siunnersuut meeqqat atuarfiata pitsaassusaa eqqarsaatigalugu ataatsimut isigalugu qaffatsitsinermut tapersiissasoq, tamannalu inuussutissarsiortut sulisussarsiortarnerannut tunngatillugu pitsaasuusaaq.

5. Avatangiisinut, pinngortitamut innuttaasullu peqqissusaannut kingunissai

Inatsisissatut siunnesuut avatangiisinut pinngortitamullu kinguneqassanngilaq.

6. Innuttaasunut kingunissai

Ilimagineqarpoq siunnersuut innuttaasunut tamanut iluaqutaasumik meeqqat atuarfianni pitsaassutsimik qaffaassasoq. Tamassumunnga pissutaavoq angajoqqaat atuarfimmik

pimoorussinissaannut tapersiinissaa ilimagineqarmat, taamaalillunilu atuarfimmi angusaqarluarnissamut atuartut atuarnerminni naammassisaqartarnerisa annertusinissaannut angajoqqaat pimoorussinerannut aamma tapersiissalluni.

7. Kingunissai pingaaruteqartut allat

Siunnersuut annertuunik allanik kinguneqassanngilaq.

8. Oqartussaasunut kattuffinnullu tusarniaaneq

Inatsisissatut siunnersuut piffissami 18. maj 2016-imiit 23. juni 2016-imut tusarniaaffigineqartunut ukununnga tusarniutigineqarpoq:

Naalackersuisut siulittaasuata Naalackersuisoqarfia

Aningaasaqarnermut Naalackersuisoqarfik

Ineqarnermut, Sanaartornermut Attaveqatigiinnermullu Naalackersuisoqarfik

Pinngortitamut, Avatangiisinut Inatsisinillu Atortitsinermut Naalackersuisoqarfik

Peqqissutsimut Naalackersuisoqarfik

Aalisarnermut, Piniarnermut Nunalerinnermullu Naalackersuisoqarfik

Inuussutissarsiornermut, Suliffeqarnermut Niuernermullu Naalackersuisoqarfik

Ilaqutariinnermut, Naligiissitaanermut Isumaginninnermullu Naalackersuisoqarfik

Aatsitassanut Ikumatissanullu Naalackersuisoqarfik

Sulisitsisut (GE)

SIK

KANUKOKA

NUSUKA

IMAK

AK

ASG

Ilisimatusarfik

Avannaani Ilinniarnertuunngorniarfik/Nordgrønlands Gymnasium

Qeqqani Ilinniarnertuunngorniarfik/Midtgrønlands Gymnasium

Campus Kujalleq

Kalaallit Nunaanni Teknikimik Ilinniarfik (KTI)

INUILI

Imarsiornermut Ilinniarfik

NI-Nuuk

Peqqinnissaqarfimmi Qullersaqarfik

Perorsaanermik Ilinniarfik

Savaatilinnorniat atuarfiat

Aalisarnermut Piniarnermullu Ilinniarfik

Eqqumiitsuliornermik Ilinniarfik

Kommuneqarfik Sermersooq

Kommune Kujalleq

Qeqqata Kommunia

Avalak
Kisaq
KIK
Nuna tamakkerlugu Ilitsersuisarfik
MIO
MIBB
Nanu Børn
Mælkebøtten
Sisimiut Friskole
Nuuk Internationale Friskole
Efterskole Villads Villadsen
Maniitsup Efterskolia

Tusarniaanermi piffissaritinneqartup naanerani tusarniaaffigineqartunit ukuninnga akissutininik tigusaqartoqarpoq: GE-p, Aningaasaqarnermut Naalackersuisoqarfiup, Kommune Kujalliup, GU-Aasiaat, Meeqqat Illersuisuata, Ilisimatusarfiup, IMAK-ip, Qeqqata Kommuniata, SIK-p aamma Kommuneqarfik Sermersuup tusarniaanermi akissutaat misissorneqarput tusarniaanermilu akissutit pillugit allakkiami ilanngunneqartumi oqaaseqaateqarfigineqarlutik. Aammattaaq Inuusutissarsiornermut, Suliffeqarnermut Niuernermullu Naalackersuisoqarfimmit kiisalu Ilaqutariinnermut, Naligiissitaanermut Inatsisinillu Atuutitsinermit Naalackersuisoqarfimmit tusarniaanermi akissutit tiguneqarput, taakkulu siunnersuummut oqaaseqaatissaqanngillat.

Tusarniaaneq siunnersuummik allannguinermit kinguneqarpoq, tassaalluni IMAK-ip tusarniaanermi akissutaa tunngavigalugu angajoqqaat siunnersuisoqatigiivini ukiumoortumik nalunaarusiaasa avammut saqqummiunneqartarnissaat maannakkut siunnersuutigineqarnera. Tamassuma saniatigut GE-p tusarniaanermi akissutaa tunngavigalugu danskisut taaguutaata annikitsumik allanngortinneqarpoq.

Aammattaaq Siulittaasup Naalackersuisoqarfiani Inatsisilernermit Immikkoortortaqarfiani inatsisilerinermit teknikkikkut misissorneqarpoq, tamannalu inatsisilerinermit teknikkikkut allannguutininik arlalinnik kinguneqarpoq. Naggasiullugu Inatsisartut Allattoqarfiani inatsisilernermit teknikkikkut misissuinermit atatillugu siunnersuummi kapitalit immikkoortiterneri allanngortinneqarput aammalu qinersisarneq pillugu inatsimmut innersuussutit peerneqarlutik. Tassunga peqatigitillugu danskisut taaguutit “aflønning” uuminnga taarserneqarput “vederlægges”, tassa atorfeqartitsivinnek pineqanngimmat. Taamaammat maannakkut taaguutit “vederlag” aamma “vederlægges” atorneqarput. Naggasiullugu aalajangersarneqarpoq Kommunalbestyrelsinut, nunaqarfinni aqutsisunut ilagiillu sinniisaannut qinersisarneq pillugu Inatsisartut inatsisaat naapertorlugu qinigaasinnaanermut aalajangiisartut Naalackersuisunit pilersinneqartut qinigassanngortittup pinerluttulerinermit pineqaatissinneqarnini pissutigalugu qinigaasinnaannginnersoq aalajangiisassasut. Taamatuttaaq pinerluttulerinermit pineqaatissiineq imatut ittuunersoq

ilaasortap siunnersuisoqatigiinnit tunuarnissaanik apeqqut eqqarsaatigalugu. Tassunga peqatigitillugu siunnersuisoqatigiinnut qinersisinnaatitaaneq erseqqissarneqarpoq.

Naggasiullugu siunnersuut imatut allanngortinneqarpoq, kommunlabestyrelsimut qinersineq peqatigalugu siunnersuisoqatigiinnut qinersisoqartassanngitsoq. Maannakkut allaqqalerpoq ulloq aalajangersimasoq nallertinnagu qinersisoqartassasoq.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Kapitalit immikkoortiternerat qulequttallu nutaap angajoqqaat nuna tamakkerlugu siunnersuisoqatigiit pillugu atuarfik pillugu inatsimmi aalajangersakkat nutaat ilanngunneqarnerisa kinguneraa.

§ 42a.

Imm. 1.

Aalajangersagaq nutaajuvoq aammalu angajoqqaat nuna tamakkerlugu siunnersuisoqatigiivisa pilersinneqarnissaanut pisinnaatitsinermut tunngaviulluni.

Imm. 1-imi siunnersuisoqatigiinnut ilaasortanngornissamut tunngaviusumik piumasagaatit allallugit angajoqqaat sinnisai qinerneqarnissaanut killilerneqarput. Angajoqqaatut oqartussaasuseqarnissamik piumasagaat aallaaviuvoq, tassa inuit qinersinerup nalaani meeqqanut atuarfimmi allatsissimasunut angajoqqaatut oqartussaassusillit qinigaasinnaammata.

Siunnersuisoqatigiinni ilaasortat qassiussanersut aalajangersakkami allaqqanngilaq. Tamassumunnga kommunit amerlassusaat tunngaviussaaq. Aalajangersagaq taamaalilluni kommunit amerlassusaa allanngortinneqarsinnaanerannut tunngatillugu sillimaffigineqarpoq.

Aalajangersakkami ”paarisaqarnissamik akuersissuteqartut” ilanngunnerani erseqqissarneqarpoq, taakku angajoqqaatut oqartussaasuseqartutulli siunnersuisoqatigiinnut qinersinermi qinigaasinnaasut. Taamaalilluni angajoqqaatut oqartussaasuseqartut qinigassanngortissinnaanerata tassungalu peqatigitillugu meeqqanik taakkununnga angajoqqaarsiat qinigassanngortissinnaanerata aalajangersakkami akornutissaqartinneqanngilaq.

Aalajangersagaq tamassuma saniatigut imatut paasineqassaaq, angajoqqaat avissimagaluarpataluunniit angajoqqaat taakku marluk ataatsimut angajoqqaatut oqartussaasuseqarnissaq isumaqatigiissutigineqarsimappat qinerneqarsinnaasut. Taamaattoqarnerani angajoqqaat marluullutik qinerneqarsinnaapput.

Aalajangersakkami aamma ersippoq meeqqap atuarfimmi atuartuuvinnissaa piumasagaataanngitsoq, tassa qinerneqarsinnaaneq meeraq piffissami meeqqat atuarfianni allatsiffianni qinerneqarsinnaaneq atuutilertarmat.

Imm. 2.

Siunnersioqatigiisitap suliassai imm. 2-mi pineqarput.

Nr. 1-imi ersippoq meeqqat atuarianni pitsaassutsip qaffatsinnissaa ataatsimut isigalugu oqaaseqaateqartarnissaq siunnersuisoqatigiit pisussaaffigigaa aammalu pitsaassuseq pillugu nalunaarusiat siunnersuisoqatigiip sammisarpassuarni inassuteqaateqarfigisinnaasaata ilagineraat. Pitsaassuseq pillugu nalunaarusiat siunnersuisoqatigiit ataatsimut isigalugu oqaaseqaateqarfigisinnaavai, aammalu inatsimmi atuuttumi § 49 naapertorlugu pitsaassuseq pillugu nalunaarusiat aalajangersimasut atuarianni pisortat ataasiakkaat sularinissaannut pisussaaffigisaat atuariannilu pisortat tamassuma kingorna kommunalbestyrelsimut nassutassaat oqaaseqaateqarfigisinnaanagit. Siunnersuisoqatigiit inassuteqaatai assersuutigalugu tassaasinnaapput pissutsit pitsaassuseq pillugu nalunaarusiani takutinneqartutut isikkoqartut, tassaasinnaallutillu suliniutissatut siunnersuutit meeqqat atuarianni pitsaassutsimik qaffatsitsisinnaasut.

Aalajangersakkami nr. 2 imatut paasineqassaaq suliniutinut, tassunga ilanngullugit atuarifik pillugu malittarisassanut nutaanut siunnersuutinut tunngatillugu siunnersuisoqatigiit tusarniaavigineqartassasoq.

Aalajangersakkami nr. 3 imatut isumaqannigilaq siunnersuisoqatigiit atuariannut ataasiakkaanut tunngatillugu aalajangersimasunik suliaqartassasoq, tassunga ilanngullugu atuarianni ataasiakkaani suliassat ataasiakkaat pillugit isummertassasoq. Aalajangersagaq akerlianik imatut paasineqassaaq, atuarianni siulersuisut inatsimmi § 45 naapertorlugu suliaqartarnerannut tunngatillugu siunnersuisoqatigiit siunnersuisassasoq ilitersuisassasorlu.

Aalangersakkami nr. 4 suliniutinut aalajangersimasut tunngavoq, tamanna imatut paasineqassaaq meeqqat atuarianni suliniutit piffissamut sammisanullu killilikkat. Suliniutit tassaasinnaapput suliniutit imarisaat meeqqat atuariannut tunngappata pitsaassusileeriaatsinik ineriartortitsineq, suliamik ingerlatsinerup pitsannorsarnissaanut suliniutit, atuarianni aqutsisut, atuariarnermi ilinniartarnermilu ileqqut il.il. Aalajangersagaq imatut paasineqassannigilaq siunnersuisoqatigiit ineriartortitsinermi suliniutinik nammineq aallartitsisassasoq suliniuteqartassasorluunniit, tassa aalajangersakkami ineriartortitsinermi suliniutinut naleqquttunut siunnersuisoqatigiisitap peqataanissamut isumaginninnissamut taamaallaat pisussaaffilerneqarmat.

Aammattaq alajangersakkami nr. 5-imi ersippoq, paasissutissat, ilisimasat misilittakkallu atuariannut tunngassuteqartut pingaarutillit siunnersuisoqatigiisitap avammut saqqummiuttassagai. Tassaasinnaapput ilisimasat ileqqusartut atuutilersinneqarnikutut taaneqartartut nalunaarusiani, nassuiaatini, malittarisassani allagaatinilu allani allassimasinnaasut kiisalu siunnersuisoqatigiisitap ingerlatsinera misilittagaqarneralu tunngavigalugit siunnersuisoqatigiit ilisimaligai. Siunertaq tassaavoq siunnersuisoqatigiisitap ilisimasaanik piginnaasaanillu pitsaanerpaamik atuinissap qulakkeerneqarnissaa.

Imm. 3.

Aalajangersakkami ersippoq suliassanik suliaqartarnermut tunngatillugu siunnersuisoqatigiit ingerlatsinerat imm. 2, nr. 1-5-imi suliassanut taaneqartunut killeqartinneqartoq, tassa siunnersuisoqatigiissiitaaq pissutsinut atuarfik pillugu inatsimmi killilersorneqartunut tunngassuteqarpata nammineerluni suliassanik allanik suliaqarsinnaammat. Assersuutigalugu tassaasinnaapput suliassat aalajangersimasut qanoq suliarineqartarnerannik mississuineq, taakkulu assersuutigalugu tassaasinnaallutik iliuusissatut pilersaarut atuartulluunniit mappiisa il.il. suliarineqartarnerat.

Imm. 4.

Aalajangersakkami pineqarput siunnersuisoqatigiit ataatsimiittarneri, ukiumut ataatsimiittarnerat ikinnerpaaffissaat allallugu. Ikinnerpaaffissaat aalajangerneqarpoq ingerlatsinerup aalajangersimasumik qaffasissuseqarnissaata qulakkeerneqarnissaanik kissaateqarneq tunngavigalugu. Piumasaqaataanngilaq naapilluni ataatsimiittoqartariaqartassasoq, tassa ataatsimiinnerit oqarasuaatikkut ataatsimiinnikkut imaluunniit atortut elektroniskiusut atorlugit ingerlanneqarsinnaammata.

Aalajangersakkami naggatit aappaat, taanna malillugu ataatsimiinnerit tamanut ammasuunnginerannut pissutaavoq inassuteqaatit, siunnersuinerit ilitersuinerillu oqaasertalersorneqarneri avammut saqqummiunneqartinnagit killilersorneqarani ammasumillu oqallisigineqartarnissaasa qulakkerneqarnissaa. Tamanna aalajangersakkami naggatit pingajuat naapertorlugu ullormut oqaluuserisassat imaqarniliallu avammut saqqummiunneqartarnerannut sanilliunneqassaaq.

Imm. 4-mi naggatit pingajuat siunnersuisoqatigiit ataatsimiinnerani ullormut oqaluuserisassat imaqarniliallu pillugit naggatit pingajuanni malittarisassamik pingaarnermik saneqqutsineruvoq. Kisiannili allatut periuseqarsinnaaneq pillugu aalajangersagaq inuit pillugit paasissutissanik mianerisassanik imaqarpata taamaallaat atorneqarsinnaavoq.

Imm. 5.

Aalajangersakkami allaqqavoq siunnersuisoqatigiit suleriaasia minnerpaamik sunik imaqassanersoq. Suleriaatsimi assersuutigalugu ataatsimiinnerit akuttussusissaat, ataatsimeeriaatsit ataatsimiinnissanullu aggersaasarnert pillugit malittarisassiortoqarsinnaavoq.

§ 42b.

Imm. 1.

Aalajangersagaq nutaajuvoq siunnersuisoqatigiinnullu qinersisarneq pineqarluni, aammattaaq siunnersuisoqatigiinnut qinersisarneq pillugu apeqqut aalajangersakkami erseqqissarneqarpoq. Nunami sumiiffiit siammasinneri atuarfiillu angissusaasa assigiinnginnerat aalajangersakkami

ersersinneqarpoq. Ilaasortat pineqartut taamaalillutik kommunip pineqartup iluani meeqqamut atuarfimmi angissusiatigut taaneqartumi allatsissimasumut angajoqqaatut oqartussaassuseqarnermikkut imaluunniit paarisqaqarnissamut akuersissuteqarnermikkut siunnersuisoqatigiinni ilaasortaasinnaapput.

Imm. 2.

Qinersinerit piffissamut inissinneqarnerat pissutsit eqqarsaatigalugit aalajangerneqartut aalajangersakkami allaqqapput. Aalajangersagaq § 42d, imm. 5 sanillunneqassaaq, taanna malillugu ilaatigut piffissaq qinersivissaq pillugu malittarisassiortoqarsinaalluni. Piffissat qinersivissat § 42c, imm. 3-mi allaqqapput.

Imm. 3.

Qinersinernut atatillugu suliassanut tunngatillugu akisussaaffiit agguarneri aalajangersakkami allaqqapput. Kommunalbestyrelsit akisussaanerannut pissutaavoq qinersinerup kommunip pineqartup killingata iluani atuarfinnut attuumassuteqarnera, tak. imm. 1.

§ 42c.

Imm. 1.

§ 42a, imm. 1 naapertorlugu meeqqamut atuarfimmi allatsissimasumut angajoqqaatut oqartussaassuseqarnissaq imaluunniit parinissaanut akuersissuteqarnissaq siunnersuisoqatigiinnut qinigaanissamut piumasaqaatiginerata saniatigut piumasaqaatit aalajangersakkami allaqqapput.

Piumasaqaatit assersuutigalugu atuarfinni siulersuisuni ilaasortanut piumasaqaatigineqartut assignngilaat, tassa Danmarkimi innuttaasutut pisinnaatitaanissaq piumasaqaataangimmat. Tamanna siunnersuisoqatigiissitap suunera aallaavigalugu isigineqassaaq, tassa siunnersuisoqatigiit assersuutigalugu atuarfinni siulersuisut ilagiilluunniit sinniisaasa immikkoortuni arlalinni aalajangiisinnaatitaasut akerlianik aalajangiisinnaatitaaffeqangimmat.

Tamassumunnga tunngaviuvoq siunnersuisoqatigiinnut ilaasortaanermi pingaaruteqartoq tassaasariaqartoq ilaasortap meeqqamut atuarfimmi atuartumut angajoqqaatut oqartussaassuseqarnissaa paarisqaqarnissamulluunniit akuersissuteqarnissaa. Inuk Danskisut innuttaassuseqangitsoq, taamaammat assersuutigalugu meeqqamut atuarfimmi atuartut angajoqqaajuguni siunnersuisoqatigiinnut qinigaasinnaavoq.

Soorlu atuarfinni siulersuisunut ilaasortanut aamma atuuttoq, Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersumi allaqqasutut aamma meeqqat atuarfiat pillugu inatsimmi § 45, imm. 1, nr. 1 naggatit aappaanni aamma innersuussutigineqartumi siunnersuisoqatigiinni ilaasortat ataqqinartuunissaannik taaneqartartoq piumasaqaatigineqarpoq. Tamassumunnga pissutaavoq

siunnersuisoqatigiinni ilaasortat ataqqinassuseqarnermut naleqquttumik pissusilersortarnissaasa piumasqaataaneramik isumaqarneq.

Aammattaaq oqaatigineqassaaq Meeqqanik pinerliisimannginnermut uppersaatinik piumasqaateqartussaataaneq pillugu Inatsisartut inatsisaat nr. 8, 19. maj 2010-meersoq, Inatsisartut inatsisaatigut nr. 7, 3. juni 2015-ikkut allanngortinneqartoq naapertorlugu siunnersuisoqatigiinni ilaasortaannermut atatillugu meeqqanik pinerliisimannginnermut uppersaataat pissarsiarineqarsinnaagunangitsoq. Tamassumunnga pissutaavoq siunnersuisoqatigiissitap suliaassaasa suuneri, meeqqanut 15 inorlugit ukiulinnut atatillugu illersuisoqarnissaa isumaqarfigineqanngimmat. Allaqqasoq siunnersuisoqatigiissitap sulinerani meeqqanut toqqaannartumik attaveqannginneq tunngavigalugu isigineqassaaq, siunnersuisoqatigiinnilu ilaasortaaneq ilaasortat meeqqat najortagaanniittarnissaat ilimagineqanngimmat.

Aalajangersagarli kinguneqarpoq pineqartup pinerluuteqarsimannginnermik uppersaammik naammaginartumik takutitsinissaata piumasqaataanera.

Aalajangersakkami naggammi kingullermi ersippoq qinigaasinnaanermut aalajangiisartut Naalakkersuisunit pilersinneqartut kommunalbestyrelsinut qinersinermi atugassat qinigaasinnaajunnaarnermik aalajangiisassasut. Tamanna aamma qinersisarneq pillugu inatsimmi § 59, imm. 4 naapertorlugu aalajangiisartut pisinnataaffiat tunngavigalugu isigineqassaaq, tamanna malillugu pineqaatissinneqarsimasinnaaneq pillugu paasisutissanik aalajangiisartut pissarsiniarsinnaallutik. Tamassuma saniatigut ilimagineqarpoq aalajangiisartut qinigaasinnaaneq pillugu naliliinissamut piginnaasaqassasut, taamaalilluni qinigaasinnaaneq pillugu aalajangiineq qinigaasinnaanermik naliliinermut tunngatillugu aalajangiisartunut immikkut piginnaasaqartunut inissinneqarluni.

Imm. 2.

Aalajangersakkami imm. 2-kkut siunnersuisoqatigiissitap politikkikkut sunnerneqannginnissaa qulakkeerneqassaaq, taamaalilluni siunnersuisoqatigiissitap sumulluunniit attuumassuteqannginnera tatiginartuunerani taamaalilluni apeqquserneqassanani. Taamatut mianerinninnissaq tunngavigalugu erseqqissarneqarpoq politikkikkut suliaqarfinnut pineqartunut pisortatigoortumik qinigassanngortinneq siunnersuisoqatigiinnut ilaasortatut toqqaasinnaannginnermut sanilliunneqartoq.

Taamatut tunngavilersuinerit assingi tunngavigalugit ilimagineqarpoq atuarfeqarfimmi suliaqarfinni sulineq soqutigisat aporaannerat pillugu aamma apeqqusiisoqarsinnaalertitsissasoq, tamannalu peqatigiiffinnut meeqqat atuarfiannik suliaqartunut aamma atuuppoq. Tassunga atatillugu pingaaruteqarpoq taamaallaat angajoqqaat soqutigisaat siunnersuisoqatigiinni isumagineqarnerat apeqquserneqarsinnaassanngitsoq.

Aalajangersakkap kinguneraa inuit atuarfinni ilinniartitsisutut atorfillit

siunnersuisoqatigiissitami ilaasortatut qinerneqarsinnaangitsut ilaasortarlu piffissap qinigaaffiusup ingerlanerani atuarfimmi atorfinittoq siunnersuisoqatigiinnit tunuassasoq, tamannalu imm. 6 naapertorlugu ilaasortaq piffissap ingerlanerani suliaqarfimmi aalajangersakkami taaneqartumi allami sulilerpat aamma atuuppoq.

Imm. 3.

Siunnersuisoqatigiit ilaasortat piffissaq qinigaaffiat aalajangersakkami allaqqavoq. Piffissap qinigaaffiup ukiuni sisamani sivilissuseqarneranut tunngaviuvoq, ilaasortat piffissap qinigaaffiup ingerlanerani misilittagaqarnissamut piginnaasanillu qaffassaanissamut periarfissinnissaannik kissaateqarneq. Aalajangersagaq tassanga peqatigitillugu takutitsivoq qinersinissamut naammattumik piffissaqarnissap qulakkeerneqarnissaa kissaatigineqartoq.

Aalajangersakkami naggatit aappaata kinguneraa ilaasortaq ilaasortanut allanut sanilliullugu kingusinnerusukkut ilaasortanngortoq, assersuutigalugu siunnersuisoqatigiissitami ilaasortap allap tunuarnera pissutigalugu, siunnersuisoqatigiinni ilaasortat allat peqatigalugit tunuassaaq. Allatut oqaatigalugu ilaasortap siunnersuisoqatigiissitami kingusinnerusukkut ilaasortanngornera pissutigalugu ilaasortap pineqartup piffissaq ilaasortaaffia sivitsorneqassanngilaq.

Imm. 4.

Siunnersuisoqatigiit siulittaasuata siunnersuisoqatigiinni ilaasortanik qinigaanissaa pillugu aalajangersakkap siunnersuisoqatigiit sumulluunniit attuumassuteqannginnera takutippaa, siunnersuisoqatigiinnilu tamatigut siulittaasoqartassasoq aalajangersakkami oqaatigineqarluni.

Imm. 5.

Siunnersuisoqatigiinni ilaasortat amerlanerussuteqartut taamatut aalajangiissappata, siulittaasup tunuartinneqarnissaanik periarfissaqartoq aalajangersakkami allaqqavoq.

Aalajangersagaq imatut paasineqassaaq siulittaasoq imm. 4 naapertorlugu piffissamit qinigaaffimminit nalinginnaq taarserneqarnissamut illersugaasoq.

Aalajangersakkap kinguneraa siulittaasup suliamik ingerlatsinera tunngavigalugu tunuartaanera taamaallaat pisinnaasoq suliamik ingerlatsinera imatut naammaginangitsigippat, tamanna nalinginnaasumik mianersuaalliornertut isigineqarsinnaanani. Aalajangersagaq tamassuma kinguneranik assersuutigalugu atorneqarsinnaavoq siunnersuisoqatigiissitap sulinerani annertuumik peqataasoqanngippat allatulluunniit killeqartorujussuarmik peqataasoqarpat imaluunniit siulittaasup iliuusai siunnersuisoqatigiissitap taamaalillunilu angajoqqaat soqutigisaannut akerliusut uppersarneqarsinnaappat.

Oqaasertaliussaq ”allatulluunniit” tassaasinnaavoq siulittaasup ingerlatsinerni siulittaasoq pisinnaatitaaffimmi avataaniittunut akuliunermigut pisinnaatitaaffimminik qaangiisoq.

Aamma pineqarsinnaapput pissutsit siunnersuisoqatigiit sulinerata avataaniittut siulittaasup tunuarnissaanik piumasqaateqarnermik kinguneqartut. Tamanna assersuutigalugu tassaasinnaavoq pinerluuteqarnek, qanoq issusiata kinguneranik pineqartoq siunnersuisoqatigiit ilaasortaanit allanit inuiaqatigiinnillu tatigineqarunnaarluni.

Oqaatigineqartut saniatigut siulittaasoq iliuseqarnermigut iliuseqannginnermigulluunniit siunnersuisoqatigiip soqutigisaanik suliaqarnissamut piumasuseqannginnerminik piginnaasaqannginnerminilluunniit ersarissumik takutitsippat naleqqutinnginnera innersuussutigalugu aamma tunuartinneqarsinnaavoq.

Aalajangersagaq aamma taamaallaat kinguneqassaaq pineqartup siulittaasutut ingerlaqqissinnaannginneranik pineqartullu siunnersuisoqatigiinnit tunuarnissaanik kinguneqassanani.

Siunnersuisoqatigiit tamatigut siulittaasoqarnissaata qulakkeerneqarnissaata isumagineqarnissaanik aalajangersakkami naggatit aappaannut pissutaavoq.

Imm. 6.

Aalajangersakkami allaqqavoq ilaasortaq imm. 1, imaluunniit ingerlatsiviit imm. 2-mi taaneqartutut pinerluttulerinermi pineqaatissinneqarnek pissutigalugu piffissap qinigaaffiup ingerlanerani tunuarpat qanoq pisoqassanersoq. Assersuutigalugu tassaasinnaavoq ilaasortap siunnersuisoqatigiinnut qinigaanermi kingorna atuarfeqarfimmi atorfeqalernera. Aalajangersagaq tassunga peqatigitillugu imatut paasineqassaaq ilaasortaq piffissap qinigaaffiup ingerlanerani ataqqinassutsimik piumasqaammik taaneqartartumik eqqortitsissasoq. Tassunga peqatigitillugu naggatit aappaanni ersippoq ilaasortaq kommunimit qinigaaffimmit nuuppat ilaasortaq siunnersuisoqatigiinnit tunuassasoq. Atuarfeqarfimmi immikkoortumik ilaasortap qinigaaneranut tunngaviusumik ilaasortap qaqugukkulluunniit ilisimasaqarnissaa tamassumunnga pissutaavoq.

Imm. 7.

Atuartoq piffissap qinigaaffiup naannginnerani atuarfimmit anippat atuarniniluunniit naammassippagu aalajangersagaq atuutissaaq. Angajoqqaat sinniisaat taamatut pisoqarnerani tunuarsinnaatitaavoq, tunuartaatitaananili.

Kommunalbestyrelsinut, nunaqarfinni aqutsisunut ilagiillu sinnissaannut qinersisarnerit pillugit Inatsisartut inatsisaannut (qinersisarneq pillugu inatsimmut) naggatit aappaanni innersuussineq ilaatigut kinguneqarpoq siunnersuisoqatigiinni ilaasortaneq inuiaqatigiinnik sullissinertut isigineqartoq.

§ 42d.

Imm. 1.

Aalajangersakkami oqaatigineqarpoq inuit soqutiginnittut innuttaasut siunnersuisoqatigiinnut qanoq iliorlutik qinigassanngortissinnaasut. Tamassuma saniatigut aalajangersagaq imaqarpoq inuup siunnersuisoqatigiinnut qinigassanngortinnissaminik kissaateqartup qinigassanngortinnini kommunalbestyrelsimut qaqugukkut kingusinnerpaamik nalunaarutigissaneraa. Sapaatit akunneri sisamat qinersinerup ingerlannissaata ullua tunngavigalugu naatsorsorneqassapput, piffissaritallu aalajangersakkami allaqqasup qaangernissaanut immikkut akuersisoqarsinnaanngilaq.

Imm. 2.

Kinaassuseq pillugu qinigassanngortittup pinngitsoorani ilisimatitsissutissai aalajangersakkami aalajangersarneqarput. Nalunaaruteqarneq paasisutissanik aalajangersakkami allaqqasunik tamanik imaqaanngippat nalunaaruteqarneq atorsinnaanngitsutut isigineqassaaq, tak. imm. 3.

Imm. 3.

Qinigassanngortittutut nalunaarutigineqartut suliarinissaat akuerinissaallu siunertaralugu qinersineq naammassiniariarpat pisariaqartunik iliuuseqarnissamut kommunalbestyrelsit aalajangersakkami pisussaaffilerneqarput.

Imm. 4.

Qinigassanngortittut avammut nalunaarutiginnissaannik kommunalbestyrelsit aalajangersakkami pisussaaffilerneqarput. Tamanna qanoq pissanersoq kommunalbestyrelsit namminneq aalajangissavaat. Tamanna assersuutigalugu sumiiffimmi tusagassiutit kommunilluunniit nittartagaa aqutigalugit pisinnaavoq.

Imm. 5.

Pisinnaatitsineq pillugu aalajangersagaq pineqarpoq, Naalakkersuisut taamaalillutik nalunaarusiornikkut assersuutigalugu piffissat qinersivissat, qinersinissap piareersarnera ingerlanneralu pillugit malittarisassiorsinnaallutik. Piumasaqaataavoq qinersinerup naleqquttumik ataqatigiissarneqarnissaasa aqqissuunneqarnissaasa qulakkeerneqarnissaa siunertarlugu tamanna pillugu kommunit isumasioqatigereerlugit aalajangersakkat taakku aalajangerneqassasut. Aammattaaq qinersisinnaatitaaneq qinigaasinnaanerlu pilugit annertunerusunik malittarisassiortoqarsinnaavoq, tassunga ilanngullugit inuit kikkut qinersisinnaatitaanersut qinigaasinnaanersullu, qinersineq pillugu allattuiviit qinigassanngortittullu pillugit allattuiviit, qinersineq, qinersinermi kisitsineq, piffissap qinigaaffiu inerlanerani allannguutit, qinersinermi aningaasartuutit akilerneqarnerat, naammagittaalliuteqartarnek il.il. annertunerusumik nassuiaasersornerat.

§ 42e.

Imm. 1.

Krydseliiffissat atorlugit qinersinermi pappiaqqat qinersinermi immersugassat atorneqarnissaat pillugu piumasqaammik aalajangersagaq imaqarpoq aammalu pappiaqqat qinersinermi immersugassat pillugit pissutsit pingaaruteqartut imarisaallu killilersorneqarlutik.

Imm. 2.

Aalajangersagaq imatut isumaqarpoq init qinersiviit pillugit kommunalbestyrelsi akisussaasuusoq. Aalajangersagaq aamma imatut paasineqassaq ini qinersivik karsillu qinersinermi immersukkanik ikisivissat pillugit kommunalbestyrelsi akisussaasuusoq.

Imm. 3.

Aalajangersakkami ersippoq qinersinermi immersugassanik naqiterineq agguassinerlu tamaat kommunalbestyrelsit akisussaaffigaaat.

Imm. 4.

Kommunalbestyrelsip ininik qinersiviit aaqqissuussinerlu kommunalbestyrelsip isumaginninnissaanut atatillugu aalajangersagaq isigineqassaaq.

§ 42f.

Imm. 1.

Angajoqqaat meeqqat atuarfianni siunnersuisoqatigiinnut kommunini ataasiakkaani ilaasortanik marlunnik qanoq qinersisoqartassanersoq aalajangersakkami allaaserineqarpoq. Tunngaviusumik marlunnik qinersisoqartarpoq, tassa qineqqusaartut atuarfiit immikkoortuini tamani unammilleqatigiittarmata. Tamanna imatut paasineqassaaq imaattariaqanngitsoq angajoqqaat marluk kommunimi qinigaanerpaat siunnersuisoqatigiinnut qinigaassasut. Tamanna assersuutigalugu pisinnaavoq angajoqqaat taakku marluk amerlanerpaanik qinerneqartut atuarfiit immikkoortuini ataatsimi qinigassanngortissimappata.

Imm. 2.

Qinersineq atorneqarsinnaasumik inerneqanngippat periusissaq aalajangersakkami allaqqavoq.

Imm. 3.

Sinniisussanik allattuivimmik kommuninut ataasiakkaanut tunngasumik kommunalbestyrelsit ataasiakkaat aalajangersagaq malillugu suliaqartussaataapput. Allattuiviit nunap immikkoortuinut agguakkat pineqarput, tassani allattuiviit atuarfiit immikkoortuinut marlunnut agguarneqaqqissallutik. Tamassuma kinguneraa kommunit ataasiakkaat

angajoqqaat qinerneqarnerat aallaavigalugu allattuivinni tulleriinnilersorlugit sinniisussat pillugit marlunnik allattuiveqassasut.

§ 42g.

Imm. 1.

Siunnersuisoqatigiissitap ingerlatsineranut aningaasatigut tunngaviit aalajangersakkami pineqarput aammalu aningaasartuutit suut nunap karsianit tapiissutinit matussuserneqassanersut allaqqaluni.

Siunnersuisoqatigiit isertitsissutaasartunik ingerlatsisinnaaneranut pisinnaatitsisoqanngilaq, tassa siunnersuisoqatigiit siunnersuisartuuneranut tunngatillugu tamanna naleqquttutut isigineqanngimmat, siunnersuisoqatigiillu ingerlataanut suliassanullu tunngatillugu soqutigisat aallaavigalugit ingerlatsinermik kinguneqarsinnaammat.

Allatseqarfimmit ikiorteqarneq tamarmi allaffissornerugaluartoq suliassanillu ingerlatsinerugaluartoq siunnersuisoqatigiit pisariaqartumik nammineq allatseqarfissarsiornissaa naleqqunnerpaatut isigineqarpoq. Taamaalilluni assersuutigalugu aqutsiveqarfik aalajangersimasoq allatseqarfittut siumut aalajangiutereernagu siunnersuisoqatigiit annertunerpaamik sumulluunniit attuumassuteqannginnissaa qulakkeerneqassaaq. Kisiannili siunnersuisoqatigiissitap tamanna kissaatigissappagu siunnersuisoqatigiissitap aqutsiveqarfimmi ataatsimi allatsissarsiorsinnaanera akornutissaqanngilaq.

Imm. 2.

Siunnersuisoqatigiit aningaasaliissutit ingerlaavartumik aningaasaliissutit aningaasanut inatsimmi aalajangerneqartassapput, taakkulu annertussusaat ukiumoortumik aningaasanut inatsisip isumaqatiginiutigineqarneranut atatillugu killilersorneqartassallutik.

Imm. 3.

Aalajangersakkami ersippoq Naalakkersuisut nalunaarusiornikkut siunnersuisoqatigiinni ilaasortat suliamik ingerlatsineranni aningaasarsiaat killilersortaraat, nalunaarusiamilu aamma siunnersuisoqatigiinni ilaasortaanerup kinguneranik aningaasartuutitut tunngatillugu aningaasartuutit matussuserneqarnissaat pillugu apeqquut aamma killilersorneqarpoq.

Akissarsititsineq siunnersuisoqatigiissitam ilaasortat akisussaaffeqarnerattut siunnersuisoqatigiinnilu sulinermut akissarsitsinerunngitsutut isigineqassaaq.

Imm. 4.

Siunnersuisoqatigiissitam siulittaasup akissarsiai aalajangersakkami pineqarput. Atorfiup piffissaq tamaat atorfiunera aallaavigalugu aalajangersagaq isigineqassaaq. Taamaammat ilimagineqarpoq pineqartup angajoqqaat siunnersuisoqatiginni siulittaasutut sulisinnaassasoq,

aalajangersakkamilu atorfiup pingaaruteqassusiata takutinissaa aamma siunertaavoq. Danskisut taaguummumut “løn” taarsiullugu taaguutip “vederlag” atorneqarnera nalinginnaasumik atorfeqartoqartoqannginnerata pineqarneranut tunngavoq, tassa pineqartoq qinersinikkut atorfirmumut piginnaasaqarfeqarmat.

Imm. 5.

Pisinnaatitsissut pillugu aalajangersagaq pineqarpoq, taannalu malillugu Naalakkersuisut nalunaarusiornikkut angajoqqaat siunnersuisoqatigiinnut qinersisarneq pillugu paasisitsiniaasarnermut siunnersuisoqatigiinnut tapiissutit ilaat atorneqarsinnaapput. Assersuutigalugu nittartakkat paasisutissiisarfimmik pilersitsinissaq salliutillugu eqqarsaatigineqarpoq, tassani qinigassanngortittut assigiimmik atugassaqlutik imminnut pillutik paasisitsiniaanissaannut inissaqartitsisoqartassalluni. Siunertaq taamaalilluni tassaavoq oqallittarfimmik qinigassanngortittut atorsinnaasaannik pilersitsinissaq. Qinigassanngortittunut tunngatillugu takoqqusaarutininik suliaqartarneq pillugu, assersuutigalugu qinigassanngortittut takoqqusaarusiortarnerannut, malittarisassiornissamut aalajangersagaq nammineq taamaalilluni atorneqarsinnaanngilaq.

§ 42h.

Ukiumoortumik aningaasanut inatsisip suliarineqartarneranut atugassanik ukiumi naatsorsuiffimmi aggersumi siunnersuisoqatigiit missingersuutissaatut siunnersuisoqatigiissitaq ukiut tamaasa siunnersuuteqartassaaq, siunnersuisoqatigiillu tassunga peqatigitillugu ukiumi tassani nunap karsianit tapiissutit qanoq amerlatiginissaannik siunnersuuteqartassaaq. Missingersuutinut siunnersuut imatut aaqqissuunneqassaaq immikkoortunut pingaarnernut agguarlugit ingerlatsinermut kisitsisinik siunnersuisoqatigiit siunnersuutaanik Naalakkersuisut nalilersuisinnaallutik. Missingersuutinut tapiissutissatullu siunnersuutit Naalakkersuisunut tunniunneqartassapput, tamannalu isumaqarpoq siunnersuutit ukiumi tullermi aningaasanut inatsisip suliarineqarneranut ilanngunneqarnissaanut piffissaqartitsilluni suliaassat agguanneranni akisussaasumut tunniunneqartassasoq.

§ 42i.

Imm. 1.

Namminersorlutik Oqartussat immikkoortui allat assigalugit ukiup naatsorsuiffiusup assinga siunnersuisoqatigiissitap malissagaa siunnersuisoqatigiillu ukioq naatsorsuusiortiusup assinga malissagaa suliamik ingerlatsineq eqqarsaatigalugu aalajangersakkami allaqqavoq.

Imm. 2.

Aalajangersakkami ersippoq naatsorsuutit Namminersorlutik Oqartussani immikkoortut allat assigalugit nakkutigineqartussaasut.

Imm. 3.

Aalajangersakkami pineqarpoq siunnersuisoqatigiit naatsorsuutaannik Naalakkersuisut akuersisussatut piginnaatinneqarnerat piffissarititaaq Naalakkersuisut aalajangigaat qaangertinnagu. Piffissarititap nalinginnaasumik Namminersorlutik Oqartussat iluanni immikkoortani allani piffissaritinneqartartoq malissaavaa.

Imm. 4.

Siunnersuisoqatigiit naatsorsuutaasa akuerineqareernerisa kingorna avammut saqqummiunneqartarnissaat aalajangersakkami pineqarpoq. Avammut saqqummiussisarnerup ilusissaanut piunnaasaateqartoqanngilaq, taamaammallu avammut saqqummiussineq qanoq pissanersaq siunnersuisoqatigiissitaq nammineq aalajangersinnaavoq. Ilimagineqartariaqarporli innuttaasut, sulisoqarfii il.il. siunnersuisoqatigiissitaliaq ingerlatsineranik soqutigisaqartut siunnersuisoqatigiit naatsorsutaanik ajornanngitsumik paasisaqarnissaat sillimaffigalugu avammut saqqummeeriaatsimik siunnersuisoqatigiissitaq toqqaassasoq.

§ 42j.

Imm. 1.

Siunnersuisoqatigiissitap suliaqarnerata suliaasalut annerussusaasa annertunerpaamik paasiuminartuunissaat siunertaralugu ukiup siuliani siunnersuisoqatigiit ingerlatsinera pillugu nassuiaateqarnissamut siunnersuisoqatigiit pisussaaffeqarnera aalajangersakkami allaqqavoq, tamannalu aamma siunnersuisoqatigiissitaq ukiumoortumik nalunaarutaat avammut saqqummiunneqartarnissaa pillugu aalajangersakkami oqaaseqatigiit aappaannut tunngaviuvoq.

Imm. 2.

Nalunaarusiap minnerpaamik sunik imaqarnissaa aalajangersakkami allaqqavoq. Nalunaarusiami qulequttat atorlugit siunnersuisoqatigiit ukiumi qaangiuttumi sulinera allaaserineqartassaaq apeqqutillu suut siunnersuisoqatigiit suliarisimanerai allaqqassalluni. Aammattaaq immikkoortuni aalajangersimasuni ineriartorneq nassuiarneqarsinnaavoq, tassunga ilanngullugu siuariartortoqarnersaq taamaattoqannginnersorluunniit nalilerneqarnersaq.

§ 2-mut

Piffissaq siunnersuummik atuutilersitsivissaq aalajangersakkami allaqqavoq. Siunnersuisoqatigiit piaarnerpaamik pilersinneqarnissaanik kissaateqarneq aalajangersakkap takutippaa. Piffissaq atuutilersitsivissaq aamma kommunalbestyrelsimut qinersinissamut sanilliunneqassaaq, taamaalilluni atuutilersinneqarnerata kingorna qaammatit arlaqanngitsut qaangiuppata siunnersuisoqatigiiffinnut qinersisoqassalluni. Tamaaliornikkut qinersinissamut tunngatillugu pisariaqartunik iliuseqarnissamut piffissaqartitsisoqassaaq.